

A Vît, tal Cjanâl dal Arzin, la 45^e Fieste de Patrie dal Friûl

Lis celebrazions a son stadis fatis ai 3 di Avrîl, zornade di fondazion dal Stât patriarcjâl

Te nature incontaminade dal Cjanâl dal Arzin, intune suaze uniche fra boscs e aghis, e je stade realizade la edizion numar 45 de Fieste de Patrie dal Friûl. A dâ acet aes celebrazions al è stât il Comun di Vît, il lûc là che al viveve il zovin che Ugo Foscolo al à cjapât ispirazion pal so Jacopo Ortis. Lis cerimonis a son stadis fatis propit ai 3 di Avrîl, une date significative, cemût che di fat al à ricuardât il president de Agenzie Regionâl pe Lenghe Furlane - ARLeF, **Eros Cisilino**: «O vœi marcâ un sincronisim significatîf. Chest an la Fieste si è celebrade juste te date che, tal 1077, si costituive il Stât patriarcjâl furlan. O feveli ancje di coincidence parcè che, finalmenti, tal 2022 la Fieste e torne in presince e te sô stagjon "canoniche". Cun grant plasê, po, chest an o sin tal Friûl di soreli amont par celebrâ, in comunitât, la identitât dal nestri popul». Il program siôr de Fieste - inmaneade dal Comun di Vît, cu la poie de Regjon F-VJ e de ARLeF, in colaborazion cul Istitût Ladin Furlan "Pre Checo Placerean" - al à gjoldût de presince, fra tantis autoritâts, dal assessôr regionâl aes autonomiis locâls **Pierpaolo Roberti**, che al à precisât cemût che «vuê la bandiere dal Friûl e svintule ancje sul Palaç de Regjon in place Unitât a Triest. Chest parcè che la Fieste e interesse dute



Scambi de bandiere: il Sindic di Udin, on. P. Fontanini e il Sindic di Vît, P. Gerometta.



L'Assessôr regionâl aes autonomiis locâls Pierpaolo Roberti.

la Istituzion Friûl-Vignesie Julie. Une considerazion impuartante, che o vœi marcâ. Si trate di fat di un toc di storie fundamentâl pe stesse esistence de Regjon. L'auguri al è che ancje tal avignî a sedin simpri plui ocasion tant che cheste, buinis di cjapâ dentri i centris plui piçui, judantju cussì a dâ valôr ai lôr teritoris». Di bande sô, il prin citadin

di Vît, **Pietro Gerometta**, al à volût ringraciâ la ARLeF «che, tal afidânu la organizazion di cheste edizion de Fieste, e à fat une scommesse. Par me e je pardabon une grande gjonde ancje parcè che, di sindic, o pensi che al sedi une vore impuartant cjapâ dentri in particulâr i plui zovins te tutele dal furlan, e la Fieste e jude ancje in chest».

Doi gnûfs videos pe Fieste!



Lis celebrazions de Fieste de Patrie dal Friûl a son stadis ancje la ocasion par presentâ al public doi gnûfs prodots multimediâi. Cun lengaçs une vore diferents, duç i doi a puartin la atenzion su cheste zornade impuartante che dal 2015 e je ricognossude in maniere

uficiâl de Regjon F-VJ par ricuardâ e valorizâ lis lidris, la culture e la storie di autonomie dal popul furlan.

Sul canâl YouTube "YoupalTubo" - progjet inviât de ARLeF tai mêss passâts e fat dai zovins pai lôr coetanis - tes zornadis prime dai 3 di Avrîl e je stade publicade une gnove clip dal istrionic Federico Benedet. Cu la sô ande inconfondibile, ironiche e lizere, in cinc minûts al fâs un "piçul ripàs di storie" sui fats che a an puartât ae nassite de Patrie.

Par sierâ la cerimonie civil, al è stât invezit proietât il video di une version inedita dal Imni dal Friûl, direzude di Giorgio Milocco. Il progjet al è stât volût e realizât dal Istitût Ladin Furlan "Pre Checo Placerean", in colaborazion cu la ARLeF. Interpretis di cheste version moderne di "Incuintri al doman" - nassude di une idee di Moreno Valentinuzzi - a son stâts i membris dal grup "Moments"; la lôr musiche e je insuazade intune conte fate di imagjins, che e mene i spetatôrs a scuvierzi la nature maraveose dal Biotop des Risultivis di Flambri e dal Mulin Braidà.